



SIGURDAGUR Magnús Scheving sér mikil tækifæri í kaupum Turner á Latabæ. Loksins hafi fyrirtækið aðgang að bæði sjónvarps- og vörudreifingu. Latibær hafi verið kló sem hafi verið að leita að rafmagni og fundið heilt raforkuver í Turner.

FRÉTTABLAÐIÐ/ANTON

Latibær mun alltaf lifa mig

Magnús Scheving segist vera fyllilega sáttur við sitt eftir að hafa selt Latabæ til bandarísku fjölmiðlasamsteypunnar Turner. Hann verður forstjóri fyrirtækisins hér á landi og klæðir sig aftur í Íþróttalífsbúninginn í nýrri þáttaröð. *Freyr Gígja Gunnarsson* ræddi við Magnús um breytingarnar og framtíð þessa fyrirbæris sem hefur unnið hug og hjörtu barna úti um allan heim.

S amkvæmt fréttatilkynningu sem send var út til fjölmiðla í gær um kaupin nemur fjárfesting Turner tveimur og hálfum milljarði íslenskra króna. Í kaupsamningnum er gert ráð fyrir því að söluandvirði hlutabréfa Magnúsar Scheving og eiginkonu hans, Ragnheiðar Melsteð, renni inn sem fjárfesting í nýtt félag Turner. Fyrirtækið gerir ráð fyrir því að þróa sérstakan Latabæjarheim á netinu, setja á markað alþjóðlega fata- og leikfangalínu ásamt því að hefja framleiðslu á nýrri sjónvarpsþáttaröð með Magnúsi í hlutverki Íþróttalífsins. „Það var eiginlega erfiðasti hluturinn í samningnum, að leika Íþróttalífinn, ég velti því fyrir mér hvort ég gæti það hreinlega,“ segir Magnús, sem upplýsir jafnframt að það hafi komið til tals að flytja alla Latabæjarframleiðsluna til Bandaríkjanna, sem hefði verið gríðarlegt áfall. „Okkur tókst hins vegar að sannfæra þá um að þetta væri best svona, að hafa hana hér á landi.“

Fundum raforkuver í Turner

Ár er liðið frá því að Turner sýndi því áhuga að kaupa Latabæ en fyrirtækið er eitt það stærsta í framleiðslu og dreifingu á afþreyingu í heiminum. „Við ákváðum að fara í endurskipulagningu á félaginu. Allir hluthafar vildu vera með og við ákváðum að finna kaupanda til að losa þá út.“ Magnús hefur verið á þönum síðastliðnar tvær vikur vegna kaupanna, varla sofið meira en fjóra tíma á sólarhring og það verður ekkert mikið meira um svefn á næstunni á meðan kaupin ganga í gegn. „Án gríns þá hefur fólk unnið hér bókstaflega dag og nótt.“

Magnús verður eftir undirskriftina forstjóri í nýju fyrirtæki Turner-samsteypunnar. Hann lítur á daginn í gær sem sigurdag fyrir Latabæ en ekki sem persónulegan ósigur fyrir sig eins og einhverjir kynnu að halda. „Staðreyndin er sú að við höfum verið að leita að svona samstarfsaðila í mörg ár, fyrirtæki sem hefur yfir að ráða dreifikerfi í sjónvarpi og á vörum. Við höfum alltaf verið með annað hvort; vorum komin á vörumarkað en þá tók of langan tíma að komast í sjónvarp og svo öfugt.“ Magnús líkir Latabæ

„Ég er ennþá með en þeir ráða öllu. Það hefur því eiginlega ekkert breyst hjá mér nema hvað að sviðið sem ég dansa á er orðið miklu, miklu stærra.“

við kló sem hafi verið að leita eftir straumi. „Og við fundum eiginlega heilt raforkuver í Turner.“

Magnús kveðst sáttur við þá stefnu sem Latibær sé að taka, vörumerkið sé smám saman að verða fært um að standa á eigin fótum eftir að hafa verið nátengt hans persónu. „Latibær á eftir að verða til án mín og á eftir að lifa mig.“

Bjargar breskum börnum

Magnús viðurkennir að honum finnst sorglegt að þeir sem fjárfestu með honum í Latabæ til að byrja með skuli ekki njóta þess í dag. En þetta sé saga frumkvöðla, hún sé öldudalur. Hann rifjar upp að þrisvar sinnum hafi Disney verið nálægt því að fara á hausinn þegar hann var að byrja. „Meðal annars vegna þess að hann vildi fá símfónuhljómsveit til að leika undir barnaefni. Það hafði aldrei verið gert áður.“ Hann segist á hinn bóginn aldrei eiga eftir að gleyma þeim sem tóku þátt í þessu ævintýri og hann verði þeim ævinlega þakklátur. „En nú eru að koma þrjú til fimm hundruð störf inn í landið og tveir og hálfur milljarður inn í efnahagskerfið. Ég á ennþá í Latabæ en er ekki að fá neina peninga, bara nýjan starfs-títill. Ég er ennþá með en þeir ráða öllu. Það hefur því eiginlega ekkert breyst hjá mér nema hvað að sviðið sem ég dansa á er orðið miklu, miklu stærra.“

Magnús viðurkennir að honum þyki



SAMNINGAR UNDIRRITADIR Magnús Scheving og Jeff Kupsky, forstjóri Turner í Evrópu, fagna undirritun samninga um kaup Turner-samsteypunnar á Latabæ.

FRÉTTABLAÐIÐ/VALLI

stundum eins og Latibær njóti ekki sannmælis heima fyrir. Hann er til að mynda að fara hleypa af stokkunum nýju átaki með bresku ríkisstjórninni í beinni útsendingu á BBC á þriðjudaginn. „Við erum búnir að vera að skipuleggja þetta með forsætisráðherranum, David Cameron, í margar vikur. Bretar velja íslenskt fyrirtæki til að kynna fyrir börnum holla lífshætti. Ég held að menn fatti stundum ekki hvað Latibær er, það eru þrjátíu þúsund manns að fara hlaupa með okkur maraþon í Búlgaríu í næstu viku og við jukum grænmetisneyslu í Mexíkó um rúmlega tuttugu prósent. En það kveikir enginn á þessu á Íslandi.“

Vilja hafa mig eins og ég er

Magnús segir mestu breytinguna fyrir sig persónulega þá að nú muni hann vinna fyrir aðra, það hafi hann ekki gert lengi. Hann hafi verið einn í baráttunni en nú hafi hann bandarískan risa á bakvið sig. „Og það verður forvitnilegt að sjá hvernig það fer í markaðinn, að maður er ekki lengur einstæðingur sem hefur örugglega hjálpað mér oft.“

Magnús játar að hann svífi eilítið um í lausu lofti, hann viti ekki hvort það komi yfir sig einhver tilfinning þegar hann skrifi formlega undir samninginn við Turner. „Þetta er örugglega í síðasta skipti sem ég get sagt hvað sem er. Eftir undirskriftina verð ég að fylgja PR-stefnu Turner og það er enginn smá doðrantur að læra,“ en Turner setti það sem skilyrði að Magnús yrði forstjóri næstu fjögur ár. Eftir það getur hann hætt. „Maður þarf að læra á þetta og kannski breytast, ég held samt ekki. Ég held að þeir vilji hafa mig akkúrat eins og ég er.“

Framleiðslan á nýju þáttunum hefst strax eftir áramót og Magnús upplýsir að þeir ætli sér að finna nýja fleti á þeim. Hann er jafnframt bjartsýnn á að fá Stefán Karl Stefáns-son aftur til liðs við sig, fáir ef nokkrir geti leikið Glanna Glæp betur en hann. „Hann er okkar allra besti leikari og við Stefán höfum haldið góðu sambandi. Það er örugglega hægt að fá einhvern annan til að leika Glanna en Stefán gerir það best. Mér fyndist það líka vera við hæfi að við Stefán riðum saman út í sólarlagið þegar þættirnir renna sitt skeið.“